



11 de abril de 2013. Diante da recente aprobación por parte do Parlamento de Galiza dunha proposición non de lei do PP, transacionada con AGE, para o **impulsar o aproveitamento da biomasa forestal con fins enerxéticas** e "reducir a dependencia enerxética do noso país", ADEGA quere manifestar o seu rexeitamento ao espírito e obxectivos da mencionada iniciativa. Baixo o "inocente" paraugas do autoconsumo doméstico e da promoción das caldeiras de leña e "pellets", agóchase a intención do oligopolio pasteiro-enerxético de **recolonizar o país con eucaliptos** e outras especies de crecemento rápido, da man dun [decreto de cultivos enerxéticos](#) que está a preparar o PP. Plantar milleiros de hectáreas de masas monoespecíficas de eucaliptos transxénicos, paulownias e outras invasoras en cortas de 4-5 anos, para [queimar, voltar a plantar, queimar...](#)

1. O subministro das plantas de biomasa a partir de biomasa forestal residual (residuos de aproveitamentos forestais, incluídas as cortizas, de operacións silvícolas en masas forestais e espazos verdes, de residuos de actividades agrícolas e de xardinaría) é unha **falacia**, pois o modelo de explotación empresarial que se promove procurará un suministro constante e barato da materia prima, que só é posíbel acadar mediante cultivos específicos de especies leñosas ou herbáceas de rápido crecemento, isto é,

cultivos enerxéticos

. Neste senso, no documento

"Enersilva. Promoción del uso de la biomasa forestal con fines energéticos en el suroeste de Europa"

, e relativo á central de biomasa de Mortágua, en Portugal, recóllese o seguinte:

"O consumo de biomasa (cun grado de humidade do 30%, plena carga) da central é de 8,7 t/h, o que corresponde a un consumo anual superior a 100.000 t. O abastecemento efectúase mediante unha 'carteira de provedores' que ten días marcados para efetuar as entregas. A biomasa consumida provén fundamentalmente dos montes de eucalipto próximos á central."

2. Os cultivos forestais enerxéticos, para cuxa regulamentación o PP xa presentou un [borrado de decreto](#)

, corresponderán a especies como

eucaliptos, acacias, paulownias, liquidambar,

etc. Terán ciclos curtos, en

cortas de 4-5 anos

para o que se buscará a máxima densidade de plantación posíbel.

3. As 8 plantas de biomasa previstas polo PP (a potencia máxima a instalar en Galiza é de 80MW, 10MW por planta segundo o Decreto 149/2008) son só o principio. Estas 8 plantas previstas poderían supoñer, en termos de toneladas de biomasa necesarias, un subministro anual de case un millón de toneladas. En hectareas de eucalipto significaría entre **15 e 20.000 hectareas anuais de cortas**

. Mais con toda probabilidade, o oligopolio madeireiro-enerxético presionará para modificar este decreto e ampliar o número de plantas e a potencia das instalacións.

4. O Plano Forestal de Galiza de 1993 non contempla esa adicación do monte. Os plantíos de eucaliptos e outras especies con fins enerxéticos estarían fora de calquera planificación. Porén, o borrador do PP sobre cultivos enerxéticos contempla até **100 has de superficie continua** para este tipo de aproveitamentos. A densidade dos plantíos, a súa composición e homoxeneidade estrutural suporán o

empobrecemento drástico da biodiversidade

, a

perda dos servizos ecosistémicos do monte

e unha nova

desfeita paisaxística

.

5. Os cultivos enerxéticos debido ás súas características e ciclos curtos, provocarán un empobrecemento intensivo do solo, coa conseguinte **redución da fertilidade** e da súa capacidade de renovación, condicionando o seu aproveitamento futuro para outros usos.

6. Dende a perspectiva da xestión das propiedades forestais, a promoción dos cultivos enerxéticos pasa por mobilizar grandes superficies, incluídos os montes veciñais en man común. Neste senso, o tratamento das CCMM na [lei de montes do PP](#), ás que se lles impoñen enormes cargas fiscais, persegue facilitar a formación de

Sociedades de Fomento Forestal (SOFOR)

coas grandes empresas do oligopolio da madeira. As SOFOR orientarán os aproveitamentos e a xestión dos montes veciñais segundo os intereses das empresas, que son as mesmas que promoven e van explotar as centrais de biomasa.